

No. 五八三

法華大意一卷

當卷八千八百八十八言
此品四千一百七十二言

毗陵沙門 湛然 述

妙法蓮華經序品第一

將釋此一部妙典二十八品多有諸家今暫歸天台宗每品用三門解說第一述每品大意第二釋每品名第三釋每品內文略科斷

第一述初品大意者原夫浩浩性海混動靜而凝真眇眇覺山抱理事以布教教海無盡故扣諸萬機以垂影機感萬差猶馳走五乘以分鑣然則許車長者開三車遍與一實之妙車覓子慈天集百屬同付一家之財業今此經者開權顯實之立門果海圓實之格言宏括衆經之綱紀巨海之吞千潮廣統群典之樞要猶大虛之抱萬有文苑芳馥開三生六卽之華義林翳鬱結三軌四德之果舒則一乘之義門區分明映日月卷則一極之玄樞凝真峻凌妙高所以片片慈氏之問普被塵國明明能仁之訓等窪現當遂使乘此法輪不起一處普遊無邊法界入彼法門不移一念忽現無盡劫海可謂返流歸源之寶舟盡迷翹覺之銀燭者矣教大意盡在此哉

第二釋名者今妙法蓮華經者本地甚深之奧藏也自行權實之妙法也四華六動開方便之門三變千

涌表真實之地咸令一切普得見聞是以先標妙法

次喻蓮華蕩化城之執教廢草菴之滯情會衆善之

小行歸廣大之一乘上中下根皆與記前發秘密之

奧藏稱之爲妙示權實之正軌故號爲法指久遠之

本果喻之以蓮會不二之圓道譬之以華聲爲佛事

稱之爲經圓詮之初目之爲序序義相從稱之爲品

衆次之首名第一若存梵聲可言薩達摩分陀利伽

蘇恒攬今順唐語故道妙法蓮華經序品第一

第三入文判釋者夫順頤普機受如來旨巍巍法雷

兩平等雨今維經者久遠實佛之所說三世諸佛之

至極經也權現阿難所傳胎辨羅什所譯也宿明聽

耳所請乘白遍吉所護也明知此間群生應機於圓

教招感於靈聖也一部典有八軸二十八品大分爲

三初品爲序次方便品訖分別功德品十九行偈凡

十五品半名爲正三從偈後盡經凡十一品半爲流

通又一時分爲二從初序品至安樂行十四品爲迹

門開權顯實從從地涌出品訖經十四品爲本門開

近顯遠二門各三初迹門三者序品爲迹門序次方

便品至授學無學人記品爲迹門正說法師品訖安

樂行品爲迹門流通次本門三者初踊出品訖彌勒

已問佛今答之半品爲本門序次佛告阿逸多下訖

分別功德品初長行偈頌爲正三偈後盡經名流通

今迹門三章初序有通有別初序有六一所聞之法

體卽如是是二能持之人卽我聞是三聞持之時一

時是四聞持之所從卽佛陀是五聞持之處卽王舍

城耆山是六聞持之伴卽與大比丘衆去是也有二

從與大比丘衆萬二千下訖阿闍世王與若干百千

眷屬俱第一明列衆各禮佛足退坐一面八字第二

總結也約列衆中有三從與大比丘下訖耶輸陀羅

比丘尼亦與等第一明聲聞衆從菩薩摩訶薩八萬

人下訖菩薩摩訶薩八萬人俱第二明菩薩衆爾時

釋提桓因下訖阿闍世王等第三明雜衆也第二爾

時世尊四衆圍繞下訖品竟諸求三乘人別序約中

五序從爾時世尊四衆下訖尊重讚歎第一明集衆

序從爲諸菩薩說大乘經下訖起七寶塔第二明現

瑞序從爾時彌勒菩薩下訖神通之相今當問誰第

三明疑問序從爾時彌勒菩薩訖偈終爲說何等第

四明發問序約中有一一長行云云從於是彌勒菩

薩欲重宣此義下第二偈頌有六十二行分爲二初

有五十四行頌上問云云從佛放一光我及衆會下

有八行頌請答云云從爾時文殊師利語彌勒菩薩

下第五答問序中有二第一長行第二偈頌第一長

行中有四從彌勒下訖演大法義第一明惟付答從

諸善男子我於下訖故現此瑞第二明略曾見答從

諸善男子如過去下訖求名菩薩汝身是也第三明

廣曾見答從今見此瑞與本無異下訖教善慶法佛

所護念第四明明判答云云從爾時文殊說偈第

二偈頌有四十五行分爲二一初有四十一行頌廣曾

見答從我見燈明下有四行頌分明判答等云云
妙法蓮華經方便品第二品四十七百一十六頁

今釋此品用三門第一述大意第二釋品名第三入文判釋

第一大意者夫巍巍佛智推甚深無量於一宗之考蕩蕩慧門告難解難入於三乘之息是以五甚深海騁驕罕窮其底八甚高峯鳳凰難翔其頂是故無問春雷振四種法響於三乘之蟄自說秋龍灑七成甘雨於七權之魚十如帝網籠十界而重重一乘頰梨亘十刹隱隱久後密唱緊圓珠於五千衣裏要當顯談駕寶車於一大白牛淺智千二起疑念而迷所趣深智一子宣未了而問進退能仁三止沙汰五千驚子三請精進十信是以枝葉糟糠忘繫珠而退法座眞實普機懷信財而住會席於是赫赫法王喻曇華而勸信明明智行作蓮華而發歎是以一大金烏照五姓而輝輝四一銀鏡臨七人而皎皎豈謂焦種種寂值法雨而更萌佛芽畢死關提服妙藥而復甦後生教經義緯織成行錦於五佛機智針行線縫飾果繡於三世帳諸佛本懷皆圓此部出世大意悉滿此章破執而決疑法華最第一開迷而照覺誰敢爭斯典哉文約義豐理深行普矣勝可謂不思議妙法難測量法門矣此品大意蓋如是歟

第二釋名者方者秘也便者妙也妙達於方即眞秘點內衣裏無價之寶與王頂上唯有一珠無二無別

指客作人是長者子亦無二無別如斯之言是秘是妙如經唯我知是相十方佛亦然止不須說我法妙難思故以秘釋方以妙釋便正是今品之意故言方便品

第三入文判釋者從此品下訖分別功德品彌勒說十九行偈終佛名聞十方廣饒益衆生等十五品半文大段第二正說分也若作二正從此品下訖授學無學人記八品迹門正說分也今且遂近就迹門正說大分爲二從此品初下訖願爲此衆故唯垂分別等第一大段明略開三顯一從爾時世尊告舍利弗汝已慙慙三請豈得不說等下訖授學無學人記品七品半經文第二大段明廣開三顯一約略開三顯一段有二從此品初下訖偈竟佛以方便力示以三乘第一明略開三顯一約中有長行偈頌長行中有二從品初下訖隨宜所說意趣難解第一明諸佛權實二智從舍利弗吾從成佛已來下第二明釋迦權實二智第二偈頌上二佛二智云云從爾時大衆中有諸聲聞漏盡下訖是等聞此法則生大歡喜第二明疑生執動騰疑請三遍云云第二約廣開三顯一段大分爲三第一爲上根人有法說周卽爾時世尊告舍利弗已下訖第二卷諸天子偈竟我所有福業今世若過世及見佛功德盡迴向佛道也第二爲中根人有譬說周爾時舍利弗白佛言世尊我今無復疑悔下訖授記品竟我及汝等宿世因緣吾今當說

汝等善聽三品經文也第三爲下根人有因緣說周化城喻品初告諸比丘乃往過去訖學無學人記品竟世尊慧燈明我聞授記音心歡喜充滿如甘露見灌三品經文也約第一法說周大分爲五謂法說頌解述成授記歡喜也約初法說段有長行偈頌約第一長行有三從爾時世尊告舍利弗汝已下訖汝今善聽當爲汝說第一明如來許說從舍利弗言唯然世尊下訖願樂欲聞第二明受旨從佛告舍利弗如是妙法下訖無有餘乘唯一佛乘第三明如來廣說約中有五第一明四佛章門廣上諸佛權實二智第二明釋迦章門廣上釋迦權實二智約四佛章爲四從如是妙法下訖十方諸佛亦復如是第一明總諸佛門約中有六番義四種釋四一等釋云云第二舍利弗過去諸佛以無數方便種種因緣下明過去佛章門約中云云第三舍利弗未來諸佛當出於世下明未來佛章門約中云云第四舍利弗現在十方無量百千萬億佛土中諸佛世尊下明現在佛章門約中云云第二舍利弗我今亦復如是下廣上釋迦如來權實二智約中有六義四一等釋今不釋云云第二偈頌有百二十一行大分爲二初有四行一句頌上許答次有百十六行三句頌上正答約中爲二初有七十三行一句頌上第一四佛章門從今我亦如是第二有四十三行半頌上第二釋迦章門約四佛章爲四初有三十四行三句頌上第一總諸佛門從

過去無數劫下第二有二十七行半頌上過去佛章
從未來諸世尊下第三有六行半頌未來佛章從天
人所供養下第四有四行半頌現在佛章云云從今
我亦如是下釋迦摩訶門中有四十三行半括一部妙
為下七喻作本云云

妙法蓮華經譬喻品第三卷九千八百六十言
品六千五百九十一言

今將釋此品用三門第一述一品大意第二釋品名
第三入文判釋

第一述大意者夫大智身子領中下而說望大悲世
雄應屈延而暢喻而為其喻也二車設門外稚子出
火宅是則述三乘引教一車造露地進子至道場是
則明一乘與教先談火宅然後與白牛車三界火宅
群生所居五蓋假室有情所住壽命柱根潤四相而
摧朽地水牆壁曝二耀而抱折僑慢八鳥翔振翻於
四儀遙原瞋恚八虫鬪怒目於五境廣野愚癡蠅
迷四倒而馳走貪欲狐狼抱五塵而踐踰邪見夜叉
獲因果而食人狗戒取茶鬼旋火宅而事嬉戲身見
大鬼計我所而無慚愧見取咽喉著其命而作保邊
見牛頭左角著斷常而滅因果邊見右角執前後而
如蓬亂五鈍禽獸驚愕行者於朝夕五利陋鬼煩擾
智者於晝夜唯有大慈釋尊拔濟此難大悲觀音守
護是畏三界眾生悉是佛子六道合識皆心口方諦
求更無餘乘誰留三乘十方佛土唯有一乘誰存五
姓誘人誘法受殃三途求友求法攀祥於萬代此品

大意蓋如是矣

第二釋名者譬者比況也喻者曉訓也託此比彼寄
淺訓深也此品偏舉喻為名故言譬喻品

第三入文判釋者從品初下託偈竟轉無上法輪等

第二明法說周中領解段約中有二第一長行明身

子領解陳云云第二偈頌有二十五行身子重陳云

云從爾時佛告舍利弗吾今下託教菩薩法佛所護

念第三明法說周如來述成段云云從舍利弗汝於

未來下託彼即是汝身宜應自欣慶第四明法說周

授記段約中有二第一明有長行如來授記第二明

有偈頌十一行半如來重宣云云從爾時四部眾下

託及見佛功德盡迴向佛道第五明法說周中四眾

領解段約中有三第一明長行四眾領解云云第二

明有偈六行半重頌云云上來三周中第一從爾時舍

利弗白佛言世尊我今無疑悔下託授記品大段第

二明為中根人譬說周文有四品初品正如來譬說

開三顯一信解品明四大聲聞領解藥草品明如來

述成授記品明如來授記約初中文有二從爾時舍

利弗白佛言託說其因緣令離疑悔第一明身子請

從爾時佛告舍利弗我先不言下託偈竟汝當為說

等第二明如來答約中有三從爾時佛告舍利弗我

先不言下託諸有智者以譬喻得解第一明如來發

起從舍利弗若國邑下託偈頌中我為法王於法自

在安穩眾生故現於世第二明如來譬說從汝舍利

弗我此法印託偈竟汝當為說妙法華經第三明如

來勸信約第二譬說中有二初長行二偈頌約長行

中有二從若國邑下託善哉善哉如汝所說第一明

開譬從舍利弗如來亦復如是託於一佛乘分別說

三第二明合譬約第一開譬中有二從若國邑下託

若二十或至三十在此宅中第一明總譬約中有

六譬云云從長者見是大火從四面起下託善哉善

哉如汝所言第二明別譬約中有四譬云云約第二

合譬中有二從舍利弗如來亦復下託令得菩提第

一合總譬云云從見諸眾生為生老病死下託於一

佛乘等第二合別譬云云佛欲重宣此義下偈頌有

百六十五行為二初有百行頌上長行後有六十五

行明通經方法上來長行有開譬合譬偈頌亦有二

初有六十五行半頌開譬次有二十四行半頌合譬

上長行有總譬別譬初有二十三行頌總譬約中有

六譬云云次有二十二行半頌別譬約中有六譬云

云次四譬云云約合譬中有二總譬合別譬合云云

約第二通經方法又名勸進約中云云

妙法蓮華經信解品第四品三千二百
六十九言

將釋此品用三門第一述大意第二釋品名第三入

文判釋

第一述大意者夫踰躅窮子遺父家而預客作中止

慈父付家業而定天性是以二乘都無分忽得如來

家一乘末具足則成滿月鏡一日之價招羞於廢權

門三乘之賓懷慶於實相。迥無漏大果。結小乘枝而
離離無上蓮華。咲羊鹿池而葩葩圖教聲聞。以佛道
聲令聞一切。具詮羅漢於諸世間。應受供養。法華以
前分段三德。顯於界內。法華以後變易三德。示於界
外。知恩報恩。聞先年知德謝德。覺今時誠知三乘別
執。聞中亦聞一乘圓融。明中亦明此品大意。蓋如是
矣。

第二釋名者。初聞略說動執生疑。廣聞五佛蒙龍未
曉。今聞譬喻。歡喜踊躍。信發解生。疑去理明也。此品
偏標法為名。故言信解品。

第三入文判釋。此品譬說周中。第二大聲聞領解
段文為二。從爾時慧命下訖。瞻仰尊顏。第一明經家
叙歡喜。從白佛言下訖。卷盡。第二明自陳領解約中
有二。一長行。二偈頌。約長行中有二。從而白佛言下
訖。無量珍寶。不求自得。第一明略領解。從世尊我等
下訖。如佛所應得者。皆已得之。第二明廣領解。約中
有二。從世尊我等下訖。今此寶藏自然而至。第一明
開譬。從世尊下訖。皆已得之。第二明合譬。約開譬中
有二。從世尊我等下訖。以明斯義。第一明欲開如文。
從譬若有人下。第二廣譬說中有五。從譬若訖。無復
憂慮。第一明父子相失。譬從世尊爾時窮子。備賈下
訖。猶故貪惜。第二明父子相見。譬從即遣傍人下訖。
常令除糞。第三明追誘。譬從過是已後。訖下劣之心
亦未能捨。第四明委家業。譬從復經小時下訖。自然

而至第五明付家業。譬云云。約第二合譬中有四云
云。從爾時摩訶迦葉下。第二偈有八十六行半。為二
初有七十三行半。頌上長行。次有十三偈。歡佛恩。深
約初中又為二。初有二行。頌法說後有七十一行半。
頌譬說中為二。初有四十一行。頌開譬。次有三十半
行。頌合譬云云。

妙法蓮華經藥草喻品第五 卷九千二百八十六首
品一千六百五十九首
將釋此品用三門。第一述大意。第二釋品名。第三入
文判釋。

第一述大意者。茫茫智地。等大地而載五姓森森。群
生爭草木而異五乘。乃有一乘法。雲覆三千而清涼。
一味教雨。澍五乘而殊茂。於是破有法王。隨群機而
先說彼權。即是實佛。應熟機以後。談此實是。乃假權
三草。乘各身而歸本。地方便二木。迴各心而向真。道
最實。大慧吼獅子。聲便權小果。脫野干形。敗根迦葉。
頌三草於寶苑。歷劫薩埵。悟二木於園林。汝等所行
是菩薩道。其調斯矣。此品大意。蓋如是。
第二釋名者。土地是能生。而雲雨是能潤。草木是所
生。所潤。通皆有。用而藥草。用強有。漏諸善。悉能治。惡
無漏。為最無漏。眾中四大弟子。以譬。領佛。譬深。會聖
心。佛讚善。哉甚為希。有述其得。解以喻其人。故言藥
草喻品。
第三入文判釋者。此品譬說周中。第二述成段約中
為二。從爾時世尊告摩訶迦葉下。訖說不能盡。第一

略述其領解。從迦葉當知下。訖漸漸修學。悉當成佛
道。第二廣述其領解。約略中有二。第一雙述善哉。從
如來復有下。第二述其領所不及。約廣中有二。一長
行。二偈頌。約長行中有二。從迦葉當知下。訖一切種
智。第一述成開三顯。一從汝等迦葉下。訖難解難知。
第二明如來結款。約開三顯。一中有二。從迦葉當知
訖一切智慧。第一明法說中有二云云。從迦葉譬如
下。訖一切種智。第二明譬說中有二。第一譬說中有
開譬。有合譬。約開譬中有二。從迦葉下。訖華菓敷實。

第一明差別。譬從雖一地所生下。訖各有差別。第二
明無差別。譬有三云云。約第二合譬中有二。從迦葉
當知如來亦復如是。下。訖各得生長。第一合差別。譬
中有二云云。從如來說法。一相一味。下。訖一切種智。

第二合無差別。譬中有三云云。汝等迦葉下。第二復
宗稱歎云云。第二偈頌有五十四行半。頌述。領開三
顯。一中有二。初有四行。頌法說中有二云云。次有五
十行半。頌譬說中有二。初有十行半。頌開譬。次有四
十行。頌合譬。約開譬中有二。初有九行。頌差別。譬。次
有一行半。頌無差別。約第二合譬中有二。初有三十
五行。頌合差別。譬中云云。次有五行。頌合無差別。譬
中云云。
妙法蓮華經授記品第六 品一千七百
首
將釋此品用三門。第一述品大意。第二釋品名。第三
入文判釋。

第一述大意者夫斗數迦葉聞八相而更甦神通目連頌二乘而懷懼所以如語釋迦振天眼於來劫實語世雄期記於當生於是解空善現聞名相而慶實名飭提舍旃延承金光而歡淨利奇第四目連既入蓮臺五百弟子同坐華座無為深坑成八功池而生佛蓮華正位燠種潤一味雨萌佛性芽赫赫妙法深號功明明蓮華廣茂德不退菩薩不思其邊有漏凡愚何知其際此品大意蓋如是矣

第二釋名者梵音和伽羅此翻授記也此品中授記四大聲聞偏舉法為名故言授記品

第三入文判釋者此品譬說周中第四授記段約中大段有二從品初下訖像法亦爾第一大段正明與中根人等記從我諸弟子訖汝等善聽第二大段明許為下根人等說宿世因緣約第一大段中有二從品初下訖光明世尊其事如是第一明與迦葉記從爾時大目健連下訖像法亦爾第二明與三弟子記約第一段中有二一長行二偈頌約長行中有六從品初下訖無量大法第一明行因從於最後身下訖天人師佛世尊第二明得果從國名下訖名大莊嚴

第三明國劫名號從佛壽下第四明佛壽從正法住世下訖二十小劫第五明正法像法久近從國界下訖皆護佛法第六明國淨從爾時世尊欲重下第二偈頌有十二行半為六初有四行頌行因次半行頌得果次六行頌國淨次半行頌佛壽次一行頌正法

像法次半行總結第二明三人授記中有二第一明請記第二明與記約第一中有二第一明長行經家敘第二明偈頌有七行為四初有一行正請次二行半明譬說請次有二行半明合譬請次有一行明結請約第二授記中有三第一明善吉授記第二明迦旃延授記第三明目連授記各有長行偈頌各有行因得果國劫壽命法住久近皆悉如文後我諸弟子下訖汝等善聽第二大段明許為下根說中有二第一有一行半明總說次有一行更明說宿世因緣妙法蓮華經化城喻品第七品五千九百七言

將釋此品用三門第一述一品大意第二釋品名第三入文判釋

第一述大意者夫遠遠一聖證正覺於十劫墮墮二入求出家於一世自此以降劫而難思大千塵墨不足喻其遠億國慶算安得況彼劫于時大通正覺放光振地幽暝衆生仰奇生疑八方梵天尋光集會上下大梵見相來到於是十方梵王供華上殿請說大法十六王子歎德仰化欲演妙法是以智勝法王隨衆機而且轉諦緣王子沙彌覺機熟而說妙法其會會衆信大乘而聞一乘一大正覺入家室而樂禪悅十六沙彌昇法座而講妙法傳燈之功成正覺於十方結緣之力限入道於萬代然則入寂灰身餘國經生證理歸滅佛乘得度悅悅化城等尋香而忽滅急急樓閣同陽炎而隱泯定性二乘失旅次而退寶處

強識釋迦得商人而還本宅明明導師息中路而致寶城擾擾商人憚遠險而不可退此品大意蓋如是矣

第二釋名者化者神力所為也城者防非却敵之稱也知無賊亦不須城故言化城也偏舉喻為名故言化城喻品

第三入文判釋者此下第三明為下根人宿世因緣說約中有三品例前應有四段今但有二段此品正明宿世因緣次二品明下根人等授記領解述成文少不足分品故在授記段中云云約初品中有二從佛告諸比丘下訖偈竟通達無量劫第一明佛知見久遠從佛告諸比丘大通智勝下訖卷盡第二明宿世結緣約第一段中有二長行偈頌約長行中為三從初下訖甚大久遠第一明所見事從譬如下下訖百千萬億阿僧祇劫第二舉譬明久遠從我以如來知見力下訖今日第三結見昔如今從爾時世尊欲重下訖偈頌有七行頌前三義初有一行頌所見事

次有四行頌舉譬明久遠次有二行頌見昔如今約第二正結緣中有二長行偈頌約長行中有二從佛告諸比丘大通智勝下訖住於禪定八萬四千劫第一明結緣由從是時十六菩薩沙彌知佛入室下訖此城非實我化作耳第二明正結緣約第一結緣由段中有二從爾時佛告諸比丘下訖哀感而敷演無量劫集法第一明結緣遠由約中有多義云云從爾

時大通智勝如來下訖住於禪定八萬四千第二明結緣近由約中云云約第一正結緣中二從是十六菩薩訖是人若聞則便信受第一明法說結緣約中有多門云云從譬如五百下訖我化作耳第二明譬說結緣中有二從譬如五百下訖我所化作爲止息耳第一明開譬中有二云云從諸比丘如來亦復如是下訖我化作耳第二明合譬中有二云云爾時世尊欲重下訖第二偈頌有四十九行半大分爲二初有二十二行半頌第一結緣由次有二十七行頌第二正結緣初中有十二行半頌結緣遠由中有多義次有十行半頌結緣近由約第二正結緣中有二初有八行頌法說中有多義云云次有十九行頌譬說中有二初有十一行半頌開譬中有多義云云次有七行半頌合譬中有多義云云

妙法蓮華經五百弟子授記品第八 卷八千三百三十二言品二千三百七言

將釋此品用三門第一述一品大意第二釋品名第三入文判釋

第一述大意者蓋聞圓圖內秘列後周而排迹融融外現結下根而顯本乃有滿慈子等領四聞於三周僑陳如等說一喻於一章今斯富樓那說法第一表三世佛利利生第一領無量衆善清淨國統恒沙三千於一土寶明大劫孕萬億四聖於一世盤薄寶地平山陵而墳溝壑穹隆蒼天朝宮殿而得相見無女

人而停胎生無姪欲而期化生智慧持身出光無礙神通隨心飛行自在四八相好莊嚴其身七寶屬塔遍滿其國法喜之食隨念飽心禪悅之樂應時滿身滿子淨利難得可稱於是金蘭醉客問宿處而至親友家連壁富主裏寶珠而趨官事營年代遼遼忘其寶今辰暫見衣珠此品大意蓋如是矣

第二釋名者五百舉數也弟子者標人也授記示法也此品舉數標人授記故言五百弟子授記品

第三入文判釋者此下二品因緣說局中第二授記段中大段有二第一千二百人授記第二千人授記約第一中有二從品初下訖深心本願第一明經家序嘿念領解從爾時佛告下第二明如來述記約

第一中有二第一明敘其得解歡喜第二明敘即默念領解約第一中有二第一敘得解由第二敘其得解歡喜約第一由中有四從從佛聞下第一明由聞法譬說二周開三顯一從又聞授諸等等第二明由聞身子等五弟子得記從復聞宿世下第三明由聞宿世結緣事從聞諸佛有大下第四明由聞如來三

達無礙見久如今從得未曾有下第二敘其得解歡喜中有二初明內解歡喜從即從坐起下明形狀恭敬從而作是念下第二正明嘿念領解中有二初明嘿念領解中有口領解云云從唯佛世尊下第一明嘿念發迹請記從爾時佛告下第二明如來述記中

有二一長行二偈頌約長行中有二從爾時佛告諸

比丘下訖當勸精進教化衆生第一明如來述其本迹從漸漸具足菩薩之道下訖起七寶塔遍滿其國第二明如來其授記約第一段中有二從爾時佛告下訖言論之辨第一明就釋迦世行因發迹從汝等勿謂下訖教化衆生第二約過去佛世行因顯本從諸比丘下訖教化衆生第三明就三世佛時因行所得云云約第二授記中有七意云云從爾時世尊欲重下第二偈頌有二十一行半頌上發迹授記初有十四行頌發迹次有七行半頌授記約發迹中有二初有七行頌總發迹次有七行頌別滿願發迹云云約授記中有七意云云從爾時千二百阿羅漢下第二明千二百授記中有二從爾時千二百下訖不亦快乎第一明念請從佛知此等下第二明與記中有二一長行二偈頌約長行中有三從佛知此等心之所念下第一明總許千二百記從於此衆中下第二明別授陳如記從其五百下第三明別授五百記約第二頌中十一行半爲二初有九行半頌陳如記次有一行半頌陳如及五百及五百記次有一行頌總一切聲聞記從爾時五百阿羅漢下第三明五百領解中有二長行偈頌長行中有二初經家叙其歡喜從世尊我等第二明自陳領解中有二初明法說從如無知者下二明譬說中有二初從譬如有人下第二正譬說中有二開譬合譬譬如下訖無所乏短第一明開譬中有多事云云從佛亦如是下訖得未曾

有第二明合譬中有多事云云爾時阿若憍陳如等欲重下第二偈頌十二行半為二初有一行半頌其歡喜云云次十一行頌自陳領解中為二初有一行頌法說次有十行頌譬說云云

妙法蓮華經授學無學人記品第九一千二百三十七言

將釋此品用三門第一述大意第二釋品名第三入文判釋也

第一述大意者夫阿難羅云仰別記而舉望無學聲聞同他望而立所以勝幡淨國等極樂而表奇通王寶命比彌陀而爭遠多聞誓願水鏡浮於空王之池精進高行華菓結於能仁之苑寶華成道等海慧而流芳羅睺密行同諸佛而表奇無學二千澄心觀佛學滿三明授決令喜是品大意蓋如是也

第二釋名者研真斷惑名為學真窮惑盡名無學也此品中顯學無學人記故言授學無學人記品

第三入文判釋者此品因緣設周中第二授記段中第二明授二千人記中有二一明請記二明授記約請記中有二二明二人請記二明二人請約二一人請二一明嘿念請記二明發言請記初云爾時阿難

下第二明嘿念請記從即從座起下訖眾望亦足第二明發言請記從爾時學無學下訖住立一面第二明二千請記從爾時佛告阿難下第二明如來授記

中有二第一明二人授記第二明二人授記約二一人授記中有二一明阿難記中有五第一明長行授

記中有六意云云第二明偈頌重記從爾時會中下第三明八千菩薩成疑從爾時世尊下第四明如來釋疑從阿難面於下第五明如來述歎中有長行偈頌可知從爾時佛告羅睺下第二明羅睺授記中有長行偈頌可知云云從爾時世尊見下第二明二人授記中有長行偈頌如文云云上來正說分了

妙法蓮華經法師品第十二一千一百六十三言

將釋此品用三門第一述品大意第二釋品名第三入文判釋

第一述大意者夫巍巍釋迦振記聲而流歡蕩蕩藥王聞實相而懷樂是以一句之功賜無上位一念之勳封無邊國捨淨業土星散沙界如來專使月照億刹毀佛之罪輕爭毛葉謗人之業重競盤石鏡智妙華咲供養苑種智寶菓結受持林法華第一龍振三乘谷已今當說象蹴一乘峯風飛三說而六宗靡旗衆涌十妙而亂廠理智全身託經卷而遊塵國真應權身隨經處成正覺高原求水聞十如而近泥乾土發哀悟七喻而見水慈悲芳室混五姓而同此忍辱妙衣著七人而俱位法空廣床不遮畢死而安坐理姓平揚不捨懈怠而信受變化猛守防刀杖於行者清淨光身許示現於寂漠忘失章句聞如來誨空閑聽衆得天龍聞能說法師蒙佛護而令大眾喜所化弟子隨師訓見恒沙佛妙法圓宗超超然獨秀平等大慧確確然堅固此品大意蓋如是矣

第二釋名者此品明五種法師一受持二讀三誦四解說五書寫也此品偏舉人故言法師品

第三入文判釋者此下有五品是迹門流通分也大分為四法師寶塔品第一明弘經功深福重勸流通達多一品第二明引往弘經彼我兼益已證功德深重勸持一品第三明八萬大士此土願弘經新得記者他土欲弘經安樂行一品第四明外凡初心欣斯福見聲聞長憚聞菩薩殞辱自願力竭因生退沒佛為此人說四安樂行約第一段中為二第一法師品明釋尊自說弘經功福命竟流通第二寶塔品明多寶分身且助且證竟流通約第一法師品中有二第一明有長行偈頌歎美所持之法約第一段有二第一就稟道弟子門明功深福重第二就授道師門明功深福重約弟子門中有二從初下訖當得菩提第一明佛在弟子功深福重中有二從藥王下第一明簡出人類從咸於佛前下第二明簡出得記之緣從佛告藥王下第二明佛滅後弟子能持經功福重中有二意云云從若有人下第二明授道師功深福重中有長行有偈頌約長行中有二第一別明第二明總逆順得罪得福約中有二從若復有人下訖廣說此法第一明現在弟子深功大福中有五意云云從若是善男子善女人我滅度後下訖廣為人說第二明佛滅度後師功太中有二意云云從藥王若有惡人下

訖即得三菩提第二總明五種法師逆者得重罪順者得大福中有二意云云從爾時世尊欲重下第二偈頌有十六行爲三初有二行不頌長行別將勸自行化他耳次有二行頌上門通別次有十行頌別上師門功深福重次有一行歎經尊妙從爾時復告藥王菩薩第二明有長行偈頌歎所持法及示弘經方法約長行中初明經法歎中有五從爾時佛復告下訖況滅度後明歎法從藥王當知下訖手摩其頭第二明約人歎法從藥王在在下訖三菩提第三明約處歎法從藥王多有人下訖菩薩之道第四明約因歎法從其有衆生下訖菩提第五約果歎法中有五意云云從藥王若有善男子下第二明弘經方法中有二初明方法中有二意云云從藥王我於下訖令得具足第二明利益中有五意云云從爾時世尊欲重下第二偈頌有十八行半爲三初有一行總勸不頌長行次有十六行半頌上長行次有一行頌頌結勸云云

妙法蓮華經見寶塔品第十一 二千六百三十二言

將釋此品用三門第一述一品大意第二釋品名第三入文判釋

第一述大意者夫七寶靈蹟踊會地而住天漢五千龜室飭欄楯而居層階加以無數寶幢流虹幡而飄飄萬億寶鈴鳴伽音玲玲金銀圓蓋懸於中天瑠璃支提擢於四天三十三天雨天花而供養寶塔八部

龍神奏伎樂而讚嘆塔婆于時峨峨塔廟出隱隱聲以讚揚釋迦正正多寶吐冲冲辨證成大慧所以十大大衆聞塔聲以俳俳八部天人發疑心而憤憤就就大樂舉衆疑而待法響堂堂能仁稱多寶而開會醫仰仰樂說欲見全身赫赫大覺談集分身諄諄報佛放毫光而照十方浩浩分身從侍者集中城未熟天人移他土而淨穢執已熟衆生接虛空而遮少心雲集諸佛與欲請開塔戶本體釋尊應請開摩尼戶多寶如來半座同位釋迦世雄入身同塔燦燦兩尊巋然居高煌煌一塔森然秀峙十五強況等妙高而秀六宗一乘圓智無濱海而勝三乘覺持之功諸佛所歎讚持之力住純善地人天好眼人天應供憤憤俳俳切切至至難得可談此品大意蓋如是矣

說菩薩問中有二意云云從爾時佛告下訖善哉善哉第六明佛答中有三意云云從是時大樂說下大段第二明分身遠集中有七第一明大樂說請見多寶佛從佛告下訖今應當集第二明應集分身從大樂說白佛言下訖禮拜供養第三明大樂說請分身集從爾時佛放下訖亦復如是第四明佛放光遠召從爾時十方下訖如來寶塔第五明諸佛同來從娑婆世界下訖諸佛如來遍滿其中第六明嚴淨國界中有三云云從是時諸佛下訖皆在虛空第七明與欲開塔中有五意云云從以大音聲下訖付屬有在大段第二明釋迦唱募覓流通中有三意云云從爾時世尊欲重第二偈頌有四十八行半大分爲三初有三行半頌多寶塔現次有八行半頌分身遠集次有三十六行頌釋迦付屬中爲二初有八行半舉三佛勸流通中有三意云云次二十七行半舉難持法中有五意云云

妙法蓮華經提婆達多品第十二 卷八千九百五言一千七百廿九

將釋此品用三門第一述大意第二釋品名第三入文判釋

第一述大意者夫浩浩圓海騰智波而洗塵眇眇覺山吐行雲蔭熱是以輪頭檀王讓位表求法於千歲沙竭龍女轉身示成佛於一生採菓汲水之功圓位於四德拾薪設食之德積印於三點床身給侍勞經

千百不忘。毘鍾求法。勤歷三祇。無退無怨。妙記忽授。調達頓漸。深疑定決。智積圖教。力用照日。於沙界頓。教威勢臨。月於億葉。小乘五難。值龍女而霧卷。別教一疑。對覺母雲。開十方賢士。誰不資此妙典。哉無邊聖人。誰不歸斯圖教。便成正覺之鴻。疑渙焉。此篇皆水。解轉身自在之奇術。在然此章。悉龜鏡智。積悱悱。遠疑望圓珠。而霜消身子。憤憤曠障。對融金露。零彼智積身子。尚默然信受。此後賢後聖。何拒不信受。此品大意。蓋如是矣。

第二釋名者。提婆達多者。此翻天熱。此品偏舉人為名。故言提婆達多品。

第三入文判釋者。此品迹門流通中。第二明引往弘經。彼我兼益。勸流通也。中大段有二。從品初下。訖蓮華化生。第一大段明昔日達多通經釋迦成道。從於時下方。訖品竟。第二大段明文殊通經龍女作佛約。第一大段中有二。第一明往昔師弟持經之相。從佛告諸比丘。下訖至不退轉。第二結會古今。從告諸比丘。訖蓮華化生。第三明勸信約。第一段中有二。長行偈頌。長行中有四。從初爾時佛告。下第一明求法時節。從於多劫中。下第二正明求法中有四意。云云。從時有仙人。下第三明求得法師。從王闍仙言。第四明聞法奉行。從爾時世尊欲重下。第二偈頌。有七行半。為五初有半行。頌求法時節。次有一行半。頌正求法。次有一行半。頌求得法師。次有二行半。頌聞法奉行。

次有一行半。結證勸信。從佛告諸比丘。下。第二結會古今。中有三。初正結會。從由提婆達多。下。第二明師弟功報。俱滿。中有二。初明弟子自報。已滿。中有三意。云云。從佛告諸比丘。未來世中。下。第三明勸信。云云。從於時下方。多賢下。大段第二明。今日文殊通經利益。中有二。第一明通經。中有五。初明智積請退。從釋迦牟尼。下。第二明待通經利益之證。從爾時文殊。下。第三明文殊即來。從智積菩薩。下。第四明智積所問。從文殊師利言。下。第五明文殊答。中有七意。云云。從文殊師利言。我於海中。下。第二明利益。中有九意。云云。

妙法蓮華經勸持品第十三一千一百九十四言
將釋此品用三門。第一述大意。第二釋名。第三入文判釋。

第一述大意者。夫藥王大樂奉勅命而發誓。無學有學。居異國而願傳于時。姨母。僑曇。易色。受記。雲母。耶輸。作念。聞決。於是。王城法王。視萬億。而勵心。沙界大士。從十方。而祈。班所願。著忍辱。鐵遮。罵。箭。被。慈。悲。甲。却。惡。口。銚。住。慈。悲。室。障。輕。慢。風。住。空。禪。床。忘。惡。鬼。辱。不。惜。易。爛。鼻。穢。身。獲。得。難。得。金。剛。體。濁。世。擯。出。不。恨。心。裏。末。世。求。法。先。望。說。法。發。誓。開。士。山。峙。三。千。發。願。賢。哲。海。浩。百。億。一。乘。妙。典。何。國。不。講。圓。教。高。文。何。家。不。寫。像。末。佛。子。誰。可。同。彼。願。濁。世。行。者。誰。不。學。此。風。哉。

第二釋名者。二萬菩薩奉命弘經。故名持品。勸八十八億弘經。故亦名勸前後雙舉。故名勸持品。

第三入文判釋者。此品迹門流通中。第三明二萬菩薩忍力成者。此土弘經。新得記者。他方弘經。大段有二。第一大段明受持。第二大段明勸持。約第一大段中有二。從品初下。訖不惜身命。第一明二萬菩薩奉命。此土持經。爾時。衆中。五百下。訖心不實。故第二明五百羅漢。八千聲聞。發誓。他國流通。從爾時佛姨母下。訖他方國土。廣宣此經。第三明諸尼請記授。諸尼記也。從爾時世尊。視八十下。大段第二明勸持。約中有二。長行中有五。從初爾時世尊。視八十下。第一明佛眼視諸菩薩。從即從座起。下。第二明諸菩薩請告勸復。復作是念。下。第三明佛嘿然。從時諸菩薩。第四明菩薩知佛意。從便於佛前。下。第五發誓通經。從即時諸菩薩。下。第二偈頌。有二十行。文分為四。初有十七行。頌被忍衣。弘經。次有一行。頌入如來室。弘經。次有一行。頌坐如來座。弘經。次有一行。總結請知。云云。

妙法蓮華經安樂行品第十四三千二百二十五言
將釋此品用三門。第一述大意。第二釋品名。第三入文判釋。

第一述大意者。夫妙德王子。問儀式於惡世。鷲峯法王。誠近處於像末。是以十種擾亂。波息心海。四箇樂行。泉踊情山。第一真典。名字難聞。最尊深經。天護常衛。輪王明珠。陵衆寶而獨秀。法王國經。逾諸經而高。

勝讀經者無憂無病誦經者不貧不陋諸天童子以爲給使衆生樂見如慕賢聖無畏之志等師子智慧之光如烏照惡罵之徒口則閉刀杖之毒何所害微妙好夢常現眠裏無盡大利恒集覺表王中亦王妙中亦妙蓋斯安樂行矣

第二釋名者身無危險故安心無憂惱故樂身安心樂故能進行故名安樂行品

第三入文判釋者此品迹門流通段中第四明初心菩薩示通經方法中大段有二第一大段明妙德問方法大段第二明如來答約大段第一有二從品初下第一明歎深行菩薩能弘經從世尊菩薩下第二問淺行菩薩云何惡世宣說是經從佛告下大段第二明如來答約中有三第一標四安樂行章門第二明解釋修行方法第三結行成之相從佛告文殊下訖安住四法第一標四安樂行章門從一者安住菩薩行處下第二明解釋標四安樂行章門中有四一明身止觀慈悲安樂行二明口止觀慈悲安樂行三明意止觀慈悲安樂行四明誓願止觀慈悲安樂行約身止觀慈悲安樂行中有二長行偈頌長行中有二從一者安住下第一雙標行處近處第二章門從文殊師利下第二解釋第二章中有二第一解釋行處第二解釋近處約第一行處中有三從初文殊下第一標行處章從若菩薩摩訶薩住忍辱地下第二解釋行處章從是名菩薩第三結行處從云何名菩薩摩

訶薩下第二明近處中三從云何下第一標章從菩薩摩訶薩不親近第二解釋中有三第一明十惱亂從常好坐禪下訖修攝其心第二明附定門助觀從文殊師利是名下訖常樂觀如是法相第三明附慧門助觀從是名菩薩下第三明結近處從爾時世尊欲重下第二偈頌有二十八行三句爲三初有一行頌標章次二十二行頌行處近處次有五三句頌行成中有多意云云從又文殊師利如來滅後第二明口止觀慈悲安樂行爲二第一明行法第二明行成初行法中有二長行偈頌長行有二第一標章從若口宣說下第二釋行法中有二第一明止行第二明觀行止行中有四從初若口第一明不說他過從亦不輕慢下第二明不輕慢從不說他人下第三明不歎不毀從又亦不生下第四明不起怨嫌從善修如是下第二明觀行從爾時世尊欲重第二偈頌有十六行半爲三初有二行頌標章次有九行半頌行法次有五行明口安樂行成中多意云云從又文殊師利菩薩下第三明意止觀慈悲安樂行中有長行偈頌長行中有三第一標章從無懷嫉妬下第二釋行法從文殊師利下第三明行成偈頌有六行爲二初有五行頌止觀二行次有一行頌行成從又文殊師利菩薩下第四明誓願止觀慈悲安樂行中有二長行偈頌長行中有二第一明行法第二明歎法第一行法中有二從初下第一明標章從於在家出家下

第二明行法從文殊師利是菩薩下第三結行成從文殊師利是法華經下第二歎經難聞中有二從初下第一明法說從文殊師利譬如下第二明譬說中有二第一明開譬中有多意云云從文殊師利如來亦復如是下第二明合譬中有多意云云從爾時世尊欲重下第二偈頌有十四行半爲二初有四行頌行法次有十行半頌歎經約第一行法中有三意云云約第二中有法說譬說等意云云從我滅度後下第三二十三行偈總結行成之相中有三初有一行半結勸修四行次有二十行半舉三報明三障清淨次有一行總結上未十四品述門
妙法蓮華經從地涌出品第十五二十七百五十七言
將釋此品用三門第一述一品大意第二釋品名第三入文判釋
第一述大意者夫他方大士□□□□說此間釋尊開所化而止請於是淨行眷屬裂大地而泉涌慈氏等衆表深疑而雲起四行菩薩問訊世尊而隨喜一乘法王開示佛慧而同誠補處彌勒不知一人而發疑地前賢哲用何智術而測位是以逸多大士問涌出於誰化久成實佛顯諸力於自度爾時歲促化長迷忽然發心裏父少子老喻倉卒吐口表非久遠智者誰人決此疑哉非本佛妙智誰者示斯旨哉大中亦大一中亦一蓋斯□□歎
第二釋名者下方菩薩爲發本門壽量遠從地涌現

故言從地涌出品。師嚴道尊。鞠躬祇奉。如來一命。四方奔涌。故言從地涌出品。三世化道。惠利無量。一月萬影。孰能思量。召過以示現。弘經以益當。故言從地涌出品。虛空滿。然無早晚。惑者執迹。而暗其本。召昔示今。破近顯遠。故言從地涌出品。寂場少。及寂光老。兒示其藥力。咸令得知。故言從地涌出品。文云。是從何所來。以何因緣。集今以諸義釋。品意四悉。檀因緣之解。故言從地涌出品。

第三入文判釋者。從此品下。訖普賢勸發品。十四品。部大段第二。明開師門之近迹。顯佛之遠本。約中大分為三段。從品初。爾時他方國土諸來菩薩。訖汝等自當因是得聞。半品第一。明本門序。分從爾時釋迦牟尼佛告彌勒下。訖分別功德品。彌勒所說十九行。偈佛名聞十方。廣饒益衆生。第二。明本門正說。分從爾時佛告彌勒菩薩下。訖普賢勸發品。作禮而去。十一品。半。第三。明本門流通分。約序分段中。有二。第一。明涌出序。第二。明疑問序。約第一。踊出中。有三。從品初下。訖當於此土而廣說之。第一。明他方菩薩請弘經。從爾時佛告諸菩薩下。訖廣說此經。第二。明如來不許從佛說是時。下。第三。明下方涌出中。有二。第一。明經家敘相。第二。明問訊約第一。經家敘相中。有五。意云。從是諸菩薩從地涌出。已下。訖能於如來發隨喜心。第二。明諸菩薩問訊中。有五。意云。從爾時彌勒菩薩及八千恒河沙下。第二。明疑問序中。有二。

第一。明此土菩薩疑中有二。第一。明長行疑。念從時彌勒菩薩下。第二。偈頌有九行。半。正明問中有五。意云。從爾時釋迦牟尼佛分身諸佛下。第二。明他方疑問中。有二。一。明侍者菩薩各各陳疑問於已。佛從爾時諸佛各告侍者下。二。明諸佛各各抑待彌勒之間。如來之答。從爾時釋迦牟尼佛告彌勒菩薩善哉下。大段第二。本門正說。分約中大。分有二。第一。明有長行偈頌。誠許第二。明正說約長行有三。意云。偈頌有四行中。有三。意云。從爾時世尊說是偈已。第二。明正說。段即是答問中。大分為三段。從初此去。訖壽量品。竟。第一。正明開近顯遠。分別功德品。長行。第二。明授法身。記十九行。偈。第三。明彌勒總申領解。約第一段中。有二。第一。明略開近顯遠。動執生疑。第二。明廣開近顯遠。斷惑生信。約第一段中。有二。第一。正明略開近顯遠。第二。明因疑更請。約第一段中。有二。從爾時世尊說是偈已。下。訖我從久遠來教化是等衆。第一。明有長行偈頌。如答彌勒上問中。有多意云云。從爾時彌勒菩薩摩訶薩下。第二。明因疑更請中。有二。長行偈頌。長行中。有二。從爾時彌勒菩薩下。訖三菩提。第一。明動執生疑。從即白佛言下。訖品盡。第二。明騰疑請中。有二。第一。明法說請中。有多意云云。從譬如有人色美下。第二。明譬說請中。有長行偈頌中。有開譬合譬等多意云云。

妙法蓮華經如來壽量品第十六 卷一 萬二千一百二言 品二千一十八言

將釋此品。用三門。第一。述一品大意。第二。釋品名。第三。入文判釋。

第一。述大意者。夫華王釋尊。唱三誠於誠諦補處。慈氏發四信於佛語。所以三佛菩提。騰波於壽量海。四種佛土。開華於鷲峯山。於是善逝。巧喻下微塵。而散東國。彌勒別智。附界員。塵數八十。假父脫垢衣。於權門。億俗真。考。饒珍服於寶室。八諦。醫王。擣箭。教藥。令服。諸子。三身。覺王。對酌。劫盡。令觀。淨土。失心。稚子。服遺藥。而差。心病。恣心。狂子。聞久成。而得。本心。聖人。遠哉。至感。應淨土。異哉。澄心。到此品。大意。蓋如是矣。

第二。釋名者。如來是諸佛之通號。是上三佛之通稱。是別舉人壽量者。詮量諸佛之功德。此別標法也。亦是詮量三佛之功德。此即正詮量本地三如來功德。人法雙舉。故言如來壽量品。

第三。入文判釋者。此品本門正說。答問中。第二。明廣開近顯遠。段約中大。段有二。第一。明如來誠信。第二。明如來正答。約第一段中。有四。從品初下。第一。明如來之誠。從是時菩薩大衆下。第二。明菩薩三請。從復言唯願說之下。第三。明菩薩重請。從爾時世尊下。第四。明如來重誠。從一切世間天人下。大段第二。明如來正答。約中有長行偈頌。長行中。有二。第一。明如來法說。答第二。明如來譬說。答法說中。有二。第一。明三世益物。第二。總結不虛。約第一。明三世益物中。有二。

從一切世間下訖能令衆生發歡喜心第一明過去
益物中有多意云云從諸善男子如來見下訖雖不
實滅而言滅度第二明現在益物中有多意云云而
此中有常住不滅四字明未來益物也云云從又善
男子諸佛如來下第二明總法三世益物不虛中有
二意云云從譬如良醫下第二明如來譬說答中有
二開譬合譬中有二第一明良醫治子譬譬上三世
應化所宜第二明治子實益譬譬上三世利物不虛
約第一譬中有三從初譬如下訖遠至餘國第一明
良醫遠行譬譬過去益物中有二意云云從諸子於
後飲他毒藥下訖即取服之毒病皆除第二明還已
復去譬譬現在益物中有六意云云從其父聞子悉
已得差下訖咸使見之第三明尋便來歸譬譬未來
益物從諸善男子於意云何下訖不也世尊第二明
治子實益譬譬三世益物不虛從佛言我亦如是下
第二明合譬中有三初合過去益物譬從以方便力
下次合現在益物從亦無有能下次合治子實益不
虛譬從爾時世尊欲重下第二偈頌有二十五行半
頌上法譬大分爲二初二行半頌法說次有五
頌譬說法說中爲二初有十九行半頌二世益物次
有一行頌三世益物不虛約初二初有四行頌過
去益物中有多意云云次有五頌頌現在益物中有
多意云云次有十行半別頌未來益物中有多意云
云

妙法蓮華經分別功德品第十七 二千六百六十二頁
將釋此品用三門第一述一品大意第二釋品名第
三入文判釋

第一述大意者天恒沙大衆聞長遠壽增道損生微
塵衆生見眞佛像發無上心是以中天寶華散萬綵
而雨會頂雲漢沉水流芬馥而薰鼻根虛空天樂振
妙聲於衆耳大梵衆瓔垂輕妙於聖枝衆寶香爐遍
於九方菩薩幡蓋懸於上方龍華法王讚一乘而信
一味信心持者踰五倒而到五品本佛十妙把功德
而施三千普機十利捧利益而馳億利此品大意蓋
如是矣

第二釋名者分別者佛說壽量二世弟子得種種益
故言功德淺深不同故云分別隨便故言分別功德
品

第三入文判釋者此品本門正說中大段第二明法
身授記段中大段爲三從品初下第一明經家總敘
從於時世尊下訖發三菩提心第二明如來分別本
門增道損生菩薩五十一位差別中有二從十住位
至三地第一明約增道智德得記從四地至等覺第
二明約損生斷德得記在經文中可見云云從佛說
是諸菩薩下訖讚歎諸佛第三明時衆供養從爾時
彌勒菩薩從坐而起下偈頌有十九行正說中大段
第三明彌勒總申頌解由爲三初有二行頌頌解次
有九行頌如來分別功德次有八行頌時衆供養上

本門正從爾時佛告彌勒菩薩摩訶薩下訖普賢勸
發品作禮而去部大段第三說法流通段並本門大
段第三流通分也凡有十一品半大分爲二段從此
下訖常不輕品三品半大段第一明弘經功德重以
勸流通從如來神力品下訖普賢勸發品大段第二
明付屬流通也約第一大段中有三今此半品及隨
喜功德品第一明初品弟子因功德深以勸流通法
師功德一品第二明初品弟子果功德深以勸流通
常不輕一品第三引信毀罪福以證流通約第一此
半品中有二第一明現在四信弟子第二明滅後五
品弟子約第一現在四信中有四從爾時佛告彌勒
下第一明一念信解未能廣說中有長行偈頌約長
行中有三佛告彌勒阿逸多其有衆生下第一舉其
人從所得功德下第二明功德深中有二第一明總
福無量從若有善男子下第二明校量功德多少中
有二第一明舉五波羅蜜功德爲本校量所得功德
多少從以是功德比前功德下第二明正校量功德
多少從善男子有如是功德下第三明位行不退從
爾時世尊欲重下第二偈頌十九行追頌第一不舉
其次有五頌頌第三行位不退從阿逸多下第
二明現在第二品弟子解其言趣中有二意云云從
何況廣聞是經下訖能生一切種智第三明現在第
三品弟子廣聞廣說阿逸多下訖當知是爲深信解
相第四明現在第四品弟子具上三弟子功德中有

二意云云。已上現在四從又復如來滅後下第二明

滅後五品弟子功德中有二第一明總列五品弟子

格量四品弟子功德第二明後隨喜功德品別校量

初品弟子功德約第一中有二長行偈頌長行中有

五從初又後如來滅後下訖當知已為深信解相第

一明初品弟子直起隨喜心從何況讀誦下訖無量

千萬億劫作是供養已第二明第二品弟子加讀誦

功德中有二意云云從阿逸多若我滅度後聞是經

典下訖及造僧坊供養眾僧第三明第三品弟子加

教化令讀誦書寫功德中有二意云云從況復有人

能持是經下訖疾至一切種智第四明第四品弟子

兼行六度功德中有二意云云從若人讀誦受持下

訖皆應供養如佛之塔第五明第五品弟子正行六

度功德中有二意云云從爾時世尊欲重下第二偈

頌有十九行半頌四品弟子中為四初有五行半頌

第二品弟子次有三行頌第三品弟子次有四行頌

第四品弟子次有七行頌第五品弟子耳

妙法蓮華經隨喜功德品第十八一千三百六言

將釋此品用三門第一述一品大意第二釋名第三

入文判釋

第一述大意者夫逸多將聖問隨喜福於滅後能仁

釋尊酬展轉利於最後一偈隨喜奪二檀而獨秀須

與聞經舉兩報而居高分座功德期位於梵釋勸聞

經益結相於大人虛空應有邊功德巨有際此品大

意蓋如是矣

第二釋名者隨者隨順事理無二無別喜是慶已慶

他聞深奧法順理有實功德順事有權功德慶已有

智慧慶他有慈悲權實智斷合而說之故言隨喜功

德品

第三入文判釋者此品第二別明格量初品弟子功

德中大段有三第一大段彌勒菩薩問第二大段明

如來答從爾時彌勒菩薩下大段第一明彌勒問中

有長行偈頌如文從爾時佛告彌勒下大段第二明

如來答中有二長行偈頌長行中有二從爾佛佛告

彌勒下訖無量無邊阿僧祇不可得比第一明內心

隨喜人功德深中有五意云云從又阿逸多若人為

是經下訖為人分別如說修行第二明直外聽法功

德深中有四意云云從爾時世尊欲重下第二偈頌

有十八行為二初有九行頌內心隨喜中有五意云

云次有九行頌外聽經隨喜中有四意云云

妙法蓮華經法師功德品第十九三千五百九言

將釋此品用三門第一述一品大意第二釋品名第

三入文判釋

第一述大意者夫堪忍法王開六千功德於行者精

進菩薩覺六根清淨於經力八百功德淨肉眼而令

見障外千二勝利通肉耳而令聞遠響父母生鼻資

經力而顯伏藏有漏短舌蒙教用而受上味胎生肉

身沐一味水而成琉璃鏡受胎意根繫一乘鏡而融

染淨理一句一偈達無邊義一月一歲吐無盡說俗

間經書皆順正法資生業等悉成實相灼灼哉真教

之力煌煌哉實經之用不退菩薩難思量唯佛與佛

所了知此品大意蓋如是矣

第二釋名者法師者謂五種法師也功德者謂六根

清淨也法師舉人功德標法人法雙舉故言法師功

德品

第三入文判釋者此品流通中第二明初品弟子功

德深故以勸流通中大段有二第一大段明總列六

根盈縮功德數第二大段明別作六章解釋從初爾

時佛告下訖以是功德莊嚴六根皆令清淨大段第

一明六根盈縮功德從是善男子下訖品盡大段第

二明別作六章解釋約六根章中各有長行偈頌皆

悉如文

妙法蓮華經常不輕菩薩品第二十八千七百七十四百九十五言

將釋此品用三門第一述一品大意第二釋品名第

三入文判釋

第一述大意者夫謙下不輕敬佛性而傳芳聲上慢

比丘聞毒鼓而攀覺果是以常敬盡壽聞空中聲更

延億歲輕慢慈蕪見妙法力忽謝數過罵詈之功深

沉無聞禮敬之業高昇蓮臺威音妙法周虛空而傳

聲大勢芳聞流沙界而敷教實哉卑下之道信哉禮

敬之風歷千齡何隔涉萬代彌新一乘佛子可習能

敬之風歷千齡何隔涉萬代彌新一乘佛子可習能

敬三界群生可信所敬是品大意蓋如是歟

第二釋名者常不輕菩薩者舉人也此菩薩內懷不輕之解外敬不輕之境身立不輕之行口宣不輕之教人作不輕之目隨行得名故言常不輕菩薩品

第三入文判釋者此品第三引信毀以證流通中有二長行偈頌約長行中有三第一雙指前品罪福第二雙開今品信毀第三雙明信毀果報從初爾時佛告下第一雙指前品罪福中有二從品初爾時佛告下訖獲大罪報如前所說第一明指罪如法師品說從其所得功德下第二明指福如法師功德品說從得大勢乃往下第二明雙開今品信毀中有二第一明事本第二明本事本中有五從乃往古昔下第一明時節從有佛名下第二明佛名號從劫名下第三明劫國名從其威音王下第四明說法從得大勢下訖皆同一號第五明佛壽命久近從最初威音王下第二明本事中有三第一明時節從於像法中下第二明雙標毀者信者從得大勢以何因緣下第三明雙示得失中有二意云云從是比丘臨欲終下訖疾得二菩提第三雙明信者毀者果報中有二第一明信者果報中有二意云云從得大勢彼時四眾下訖常應受持讀誦解說書寫是經第二明毀者果報中有多意云云從爾時世尊欲重下第二偈頌有十九行半為二初有十五行半頌信者毀者因果中有五意云云次有四行頌勸持已上第一說法流通三段文了

妙法蓮華經如來神力品第二十一 一千一百一十四首
將釋此品用三門第一述一品大意第二釋品名第三入文判

第一述大意者夫踊出開士仰尊顏而發願奮住賢哲覺神力而增悅靈山法王覆長舌於梵世樹下諸佛放毛光於法界警欬之聲遍至十方彈指之響地振六種是以十方之衆生見娑婆法會無邊之群生聞虚空妙聲人人加念佛而散諸寶物國國融鐵圍而同一佛土如來法力華咲文苑如來藏芽菓結義林是故經卷所住忽成道場卷帙所在亦圓寂地受持者懸河之辨如風無礙讀誦者圓鏡之智如日除闇為屬累以盡神力為付屬以暢經能此品大意蓋如是矣

第二釋名者如來者舉人也神力者用也如來此中為付屬深法現十種大力故名如來神力品

第三入文判釋者此品下有八品大段流通中第二明付屬流通大分為三第一明此神力品屬累品屬累流通第二明藥王品下五品化他流通第三明普賢勸發品自行流通約第一段中有二第一如來神力品明菩薩受命弘經第二屬累品明如來摩頂付屬約第一品中有二長行偈頌長行中三第一明菩薩受命弘經第二明佛現神力第三明結要勸持從爾時于世界微塵下第一明菩薩受命中有二初明經家敘敬儀從而白佛言下第二明發誓弘經中有

三意云云從爾時世尊於文殊下第二明佛現神力中有二第一明所對之衆從現大神力下第二明正現十神力即為十段第一明舌相從一切毛孔下第二明身毛孔放光從一時下第三明警從俱共下第四明彈指從是二音聲下第五明地動從其中衆生下第六明普見大會從即時諸天下第七明空中唱聲從諸衆生下第八明大衆稱南無歸命以種種華香下第九明遙散諸物從于時十方下第十明十方佛土通如一佛土從爾時佛告上行等菩薩大衆下

第三明結要勸持付屬中有四第一明稱歎付屬從以要言之下第二明結要付屬從是故汝等下第三明勸付屬從所以者何下第四明解釋付屬從爾時世尊欲重下第二偈頌有十六行為二初有四行頌十種神力次有十二行頌結要付屬中有多意云云

妙法蓮華經屬累品第二十一 四百六十三首

將釋此品用三門第一述一品大意第二釋一品名第三入文判釋

第一述大意者夫常寂法王現神力以摩頂圓機普薩奉囑累而發言是以如來三智流光於未來弟子四訓報恩於諸佛大師三誠深銘於心府薩埵三言高通於佛心自行流通畢於此篇分身之客還本土化他流通末於後章多寶之主獨留閉戶三乘聖衆見屬累而且歡八部天人聞付屬而且喜此品大意

蓋如是歟

第二釋名者。屬是佛所付。屬累是煩爾。宣傳此從聖旨得名。故言屬累品。

第三入文判釋者。此品屬累流通中。第二明如來摩頂付屬中。有三從品。初爾時釋迦牟尼佛下第一明如來付屬中。有三第一明如來正付屬。從所以者何。下第二明解釋付屬。從於未來世下。第三明誠訓付屬。從時諸菩薩摩訶薩下。第二明菩薩領受從爾時釋迦牟尼下。第三明事畢。唱散中有二。第一明正唱散。從說是語時下。第二明大眾歡喜云云。

妙法蓮華經藥王菩薩本事品第二十三二千七百八十六言將釋此品用三門。第一述一品大意。第二釋品名。第三入文判釋也。

第一述大意者。夫宿王高問顯苦行於沙劫。如來秀答示經力於十喻。然則淨明德佛。澍妙法甘雨於一切衆生。喜見菩薩。翹精進經行於萬二千歲。是以薩埵喜見。獲得三昧。而燃愛身。諸佛善逝。讚揚眞供。而爲憫然。淨德王家。忽示化生。淨明法院。還奉囑累。圓寂之迹。竭鵠林悲高塔之前。臻臂燒信于時。求少苾芻。向寶所以得足。闍根大士。屬誠諦而具身三千威德。六種震動。六天應化。四華散下一指之妙。供陵三千七寶。四句之法。力茂四聖。高德十喻。強軍捧寶。釵以遊法華院。八萬將兵。靡權魔而歸蓮華。闍嚴殿手妙法之力。彌難仰堂堂。手念經之用。何易測。十沉嘆。

昇照大慧美萬佛月。臨息女人勢。讚善者現口出青蓮華香。持經者當手取草坐道場。是品大意。蓋如是歟。

第二釋名者。藥王菩薩者。舉人也。本事者。標法。此品人法雙舉。故言藥王菩薩本事品。

第三入文判釋者。此下是大段第二屬累流通之中。三段之第二。明化他流通。中有五品。此品明藥王菩薩以本願弘大法。利衆生。輕生身。重佛法。亦得都判一部方便品。明開三顯一圓。因已竟。安樂行品。明乘乘之法。壽量品。明乘果已竟。此下六品。明乘乘之人也。今此品明藥王菩薩以苦行乘乘中。大段有四。第一明宿王華菩薩問。第二明如來答。第三明利益。第四明多寶稱善也。約第一大段中。有三。從爾時宿王華菩薩下。第一明通問遊化。從世尊是藥王下。第二明別問苦行。從善哉世尊下。訖聞皆歡喜。第三明請答。從爾時佛告宿王華菩薩下。大段第二。明如來答。中不答遊化問。但答苦行問。中有二。第一明答苦行。第二明歎經約。第一段中有二。第一明事本中有三。意云云。從爾時彼佛爲一切衆生下。第二明本事有三。第一明佛爲說法。從是一切衆生下。訖過是已。後其身乃盡。第二明修供養。中有二。第一明佛在世供養。中有四意云云。從一切衆生喜見菩薩下。第二明未來苦行。中有五。第一明生王家。從即爲其父而說偈言下。第二明本事。從大王我今當還供養下。第三

明往佛所請供養。從爾時日月淨明下。第四明如來付屬。從爾時一切衆生。訖得未曾有。第五明受命任持法。中有四意云云。從佛告宿王華下。訖而供養者。第三明結會古今。中有二意云云。從若復有人以七寶滿下。第二明歎經。中有三。第一明歎能持之人。從宿王華譬如下。第二明歎所持之法。中有二。第一明歎法體中有十喻云云。從宿王華此經能救。第二明歎法用中有三。第一明拔苦用。從此經能大饒益下。第二明歎與樂用。中有十二事云云。從此法華經亦如是下。第三明結歎拔苦與樂用。從若人得聞此法華經下。第三明歎持經福深。中有二。第一明專聞品。福從宿王華若有人聞是藥王菩薩品下。第二明聞品。福中有三。第一明聞品。福從是時諸佛遙共讚言下。第二明校量所得功德。從是故宿王華下。第三明如來屬累。從說是藥王菩薩品下。大段第三。明聞品利益。從多寶如來於寶塔中下。大段第四。明多寶如來稱歎也。

妙法蓮華經妙音菩薩品第二十四二千六百九言將釋此品用三門。第一述一品大意。第二釋品名。第三入文判釋。

第一述大意者。夫靈山至覺放一光。而招開士。嚴國妙音。應光明以仰聖。衆是以眷方遠。客先現華。座於峴山。此方近主。忽疑寶華於何瑞。於是王子文殊。欲見座主寶塔多寶。令來彼哲。路次諸國。六種振動。來

到諸天百千樂奏遠來旅人奉珠問訊此會華德見
德疑因遍照法王開往因於樂器華德菩薩現果
於自身普門示現略演此品色身妙用粗暢此段此
品大意蓋如是矣

第二釋名者昔得一切衆生語言陀羅尼今以普現
色身以妙音聲遍吼十方弘宣此教故名妙音菩薩
品

第三入文判釋者此下二品化他流通第二明妙音
菩薩觀世音菩薩住三昧乘乘化他也約此品中大
段有六第一明如來放光東召第二明奉命西來第
三明十方弘經第四明二土得益第五明還歸本國
第六明聞品進道也從爾時釋迦牟尼佛下大段第
一明如來放光東從爾時一切淨光莊嚴國中有
一菩薩下大段第二明菩薩奉命西來中有二第一
明發來之緣中有六第一明經家紋福慧二種莊嚴
之由從釋迦牟尼佛下第二明被照之主從師白淨
華宿王智佛下第三明辭已佛欲來此土從爾時淨
華宿王智佛下第四明彼土佛誠勸從妙音菩薩白
其佛言下第五明菩薩受旨從於是妙音菩薩不起
第六明現相中有六第一明妙音欲來先現蓮華從
爾時文殊師利法王子下第二明文殊見相發問從
爾時釋迦牟尼下第三明佛答妙音欲來而現瑞從
文殊師利白佛言下第四明文殊願來而請見從爾
時釋迦牟尼下第五明釋迦推功多寶而能現從多

寶佛下第六明多寶佛妙音命來從于時妙音下第
二明妙音菩薩正發來中有六第一明眷屬人衆經
歷國土從是菩薩目如廣大下第二明菩薩相好從
入七寶臺下第三明妙音菩薩問訊如來從世尊我
今欲見多寶下第四明請見多寶佛從爾時釋迦牟
尼如來下第五明世尊爲妙音菩薩通白多寶從時
多寶佛下第六明多寶佛塔中稱善哉從時華德菩
薩下大段第三明妙音菩薩十方弘經中有二重問
次答約問中有二第一問昔所種善根從修何功德
下第二問今勝神力從佛告華德菩薩下第二明答
中有二第一明佛答昔所種善根問從華德汝但下
第二明答今勝神力中明現三十八身爲二初有三
十身現凡夫身從若應以聲聞下後四身明現聖人
從爾時華德菩薩白佛言下第二明第二重問答爲
二初菩薩問住何定從佛告華德菩薩下二佛答所
住定從說是妙音菩薩品時下大段第四明此土他
土得益從爾時妙音菩薩下大段第五明還歸本國
從說是妙音菩薩品時下大段第六明聞品進道
妙法蓮華經觀世音菩薩普門品第二十五 卷六千七百二
八十言

將釋此品用三門第一述大意第二釋品名第三入
文判釋
第一述大意者夫一乘妙法因法師而遠布三界人
師資冥護而傳法是以無盡高問雷振教谷釋尊秀

答龍馳義峰所以觀音之美聲琴瑟能誑勝普門之
妙形經緯娑婆機豈唯水火不能燒溺而已亦則男
女童子隨求可得一時禮念等六十而與福三十分
身散十方而說法無盡瓔珞開三檀而施一客利耶
轉施示二法而奉兩尊巍巍乎衆賢之美難宣蕩蕩
乎諸聖之德何稱此品大意蓋如是矣

第二釋名者觀世音菩薩者舉人也普門者標法也
今此品人法雙舉故言觀世音菩薩普門品

第三入文判釋者此品猶是明三昧乘乘弘經兼誠
弟子亦名普現色身三昧化他流通中大段有二第
一明問答第二明聞品得益約第一問答中有二長
行偈頌長行中有二重問答從爾時無盡意下第一
明經家敘從而作是言下第二明菩薩發言正問從
佛告無盡意菩薩下第二明佛答中有三第一明總
答第二明別答第三明佛勸持菩薩名約第一總答
中第一明受苦人數從受諸苦惱下第二明遭苦時
從聞是觀世音下第三明聞名稱號從觀世音菩薩
即時下第四明得解脫從若有持是觀世音下第二
明別答中有三第一明口機應第二明意機應第三
明身機應約口機應中有二第一明七難第二總結
約第一七難中卽爲七段第一明火難中有四初持
名之益從設入大火下二明遭苦從火不能燒下三
明火不能燒從由是菩薩下四總結從若爲大水第
二明水難中有二云云從若有百千萬億下第三明

黑風難從若復有人臨當下第四明被害難若三千大千國土滿中第五明羅刹難從設復有人若有罪下第六明紐等難從若三千大千國土滿中第七明怨賊難從無盡意觀世音下第二總結從若有眾生多於姪欲下第二明意機應中有二第一明別三毒如文云云從無盡意觀世音下第二總結從若有女人下第二明身機應中有二第一明二求中有二意云云從無盡意觀世音下第二總結從是故眾生下第二明勸持名中有三初明勸持從無盡意若有人下二明格量功德從無盡意下三總結無盡意菩薩言下第二明第二番問答中有二一明菩薩問二明如來答約初中有三業問云云從佛告無盡意菩薩下第二明如來答中有二初明別答中有三十九句一一各各明三業問從無盡意菩薩下訖度脫眾生第二明總答從是故汝等下訖遊於娑婆世界第三明勸供養中有六意云云從爾時無盡意菩薩以偈下第二偈頌有二十六行頌長行大分爲二初有十七行頌觀世音力次有九行頌普門力約初中有二初有一行頌菩薩問次有十六行頌如來答中有十意云云約普門中八意云云從爾時持地菩薩下訖品盡大段第二明聞品得益

妙法蓮華經陀羅尼品第二十六 一千二百二十七言

將釋此品用三門第一述大意第二釋品名第三入文判釋

第一述大意者夫藥王章句護法師於五濁勇世神呪防鬼災於十方加以二方天王張呪網而守百由旬十種羅刹捧呪劍而誓作七分夢中之惱尙制富單那頭上之過何怨嫌行者赫赫持經之功不畏諸難明明修行之德何願不成此品大意蓋如斯矣

第二釋名者陀羅尼者此梵語也此翻總持也今此品偏舉法爲名今存梵音故言陀羅尼品

第三入文判釋者此猶是化他流通中明五衆惡世弘經多難以呪護之以總持乘乘付屬流通中大段有四第一明菩薩問持經功德第二明佛答甚多第三明菩薩請神呪護第四明聞品得益從爾時藥王菩薩即從座起下大段第一明菩薩問從佛告藥王若有下大段第二明佛答甚多中有四初明佛正格量多少從於汝意云何下二佛問多不從甚多下三明菩薩甚多從佛言若善男子下四明佛正格量於功德從爾時藥王菩薩下大段第三明菩薩請說呪守護中有五第一明藥王菩薩呪第二明勇施菩薩呪第三毗沙門天王呪第四明持國天王呪第五明藥王呪約藥王菩薩呪中有四初明請說從即說呪曰下二明正說呪從世尊是陀羅尼下明歎神呪從時釋迦牟尼佛下四明佛印可從爾時勇施菩薩下第二明勇施菩薩呪中有四初明請從即於佛前而說呪曰下明正說神呪從世尊是陀羅尼下三明歎呪從若有侵毀下四明佛印可從爾時毗沙門下

第三明多聞天王呪中有三意云云從爾時持國下第四明持國天王說呪護中有三意云云從爾時有羅刹女等下第五明十羅刹女說呪護中有五初列名從是十羅刹女下二明說呪從寧上我頭上下三明歎呪從羅刹女說此偈已下四明羅刹等立誓從佛告諸羅刹女下佛印可從說此陀羅尼品下大段第四明聞品得益焉

妙法蓮華經妙莊嚴王本事品第二十七 一千七百一十四言

將釋此品用三門第一述大意第二釋品名第三入文判釋

第一述大意者夫嚴王邪執感八變以迴心淨德憤心屬二緣而忽開是以藏眼二子舉兩難而喻一眼龜嚴淨二親聽一願而覺優曇華於是雷音如來灑法雨於妙莊華德本身受記於樹王竊以求道近因無過善友成佛親緣豈過知識飲泉之因陰樹之緣其謂斯矣善知識能粗顯此篇此品大意蓋如是矣

第二釋名者妙莊嚴王者舉人也本事者表法也今此品內說彼妙莊嚴王本事故言妙莊嚴王本事品第三入文判釋者此品猶是化他流通中明妙莊嚴王以誓願乘乘流通中大段有六第一明事本第二雙標能所化第三明能化方便第四明所化得益第五結會古今第六明聞品得益從爾時佛告諸大眾乃往古世下大段第一明事本從彼佛法中有王名

妙莊嚴下大段第二雙標能化所化即所化一人能化三人也約中有二第一明列能化所化名從是二子有大神力下第二明別二子福慧從爾時彼佛欲引導下大段第三明能化方便中有三第一明時至從淨藏淨眼二子下第二明論議中有四第一明二子等至母所白供養佛從母告子言下第二明母讓子等命化父王從淨藏淨眼下第三明子等生邪見家恨從母告言下第四母責子等合憂念父從於是二子念其父故下第三明子弟正勸化從時父見子下大段第四明所化得益中有十第一明信此子伏彼師從於是二子下第二明父王已信從於是二子白父母言下第三明重推父母從彼時妙莊嚴下第四明化功已大歎佛功德從於是妙莊嚴下第五明俱詣佛所中有五意云云從時雲雷音宿王華下第六明與授記從其王即時下第七明出家修行從即昇虛空下第八明稱歎二子從爾時雲雷音下第九明佛述二子等行高從妙莊嚴王即從虛空中第十明王歎佛自立誓願從佛告大眾於意云何下大段第五結會古今中有二第一正結會從藥王藥上下第二明歎二菩薩從佛說是妙莊嚴王下大段第六明聞品得益

妙法蓮華經普賢菩薩勸發品第二十八
一千六百八十一頁
將釋此品用三門第一述一品大意第二釋品名第三入文判釋

第一述大意者夫震方普賢震萬國而來到山中法王吐四法而相應是以六牙白象負通吉而安慰行者六通遠客教忘句而還令通利三七精進招乘象客一妙章句避煩惱主書寫之功高昇切利持經之德秀遊兜率讚供之力現報利生毀罵之用將來繁痛懲惡勸善之事略開此篇滿願飭行之業粗舉此章是品大意蓋謂斯歎

第二釋名者普賢菩薩者梵音娑輸陀此翻普賢勸發者懋法之辭也今人法並舉故言普賢菩薩勸發品

第三入文判釋者此品第三明自行流通又明普賢以神通乘乘中大段有四第一發來第二勸發第三明如來述發第四明發益從爾時普賢菩薩下大段第一明經家敘發來中有三第一明上供之相從又與無數諸天下第二明下化之相從頭面禮釋迦牟尼下第三明修敬之義從白佛言世尊我於寶威德上王佛國下大段第二明勸發中有二第一明請問勸發第二明誓願勸發約第一請問中有二第一明請問第二明佛答約第一請問中有二第一明請正說勸發自行從若善男子下第二明更請流通勸發化他從佛告普賢菩薩下第二明佛答中有二第一明總標四法答從一者下二明別四法答從善男子下第三明結四答從爾時普賢菩薩白佛言下第二明誓願勸發中有二第一明護人第二明護法約護

人中有六第一明護其外難中有二初明總護從若魔若子下二約別舉十二非護從是人若行下第二明示身教其內法有三第一明行者感誘從是人若坐思惟下第二明教經及與三昧從世尊若後世下第三明示教利喜及以說呪護之從世尊若有菩薩得聞是陀羅尼下第三明覆護以神呪從若有受持者下第四明示其勝因從若但書寫是人命終下第五明示其近果從是故智者下第六明總結信者功德從世尊我今以神通力下第二明護法從爾時釋迦牟尼佛下大段第三明如來述勸發中有二第一明述其護法從普賢若有下第二明述護人也上有六章不述第三覆護以神呪也即為五第一述上第二示身教其內法從如是之人不復貪著下第二述上第四示其勝因從普賢若如來滅後下第三述上第五示其近果從若有人輕毀下第四述上第一護其外難從是故普賢下第五述上第六總結信者功德從說是普賢品下大段第四明勸發之得益中有二第一明別聞一品得益從佛說是經下第二明總聞一部得益等云云

毗陵沙門湛然述
法華品釋終